



Broj: 01/5-50-1-6-2/07  
Sarajevo, 27.2.2007.godine

**Z A P I S N I K  
2. sjednice Komisije za saobraćaj i komunikacije,  
održane 27.2.2007. godine**

Sjednica je održana 27.2.2007., s početkom u 14,30 sati.

Sjednici su prisustvovali članovi Komisije:

- |                                  |                       |
|----------------------------------|-----------------------|
| 1. Branko Dokić, predsjedavajući | 7. Snježana Rajilić   |
| 2. Sadik Sado Bahtić             | 8. Mehmed Suljkanović |
| 3. Selim Bešliagić               |                       |
| 4. Savo Erić                     |                       |
| 5. Šemsudin Mehmedović           |                       |
| 6. Husein Nanić                  |                       |

U ime Državne regulatorne komisije za električnu energiju sjednici su prisustvovali Vladimir Dokić predsjedavajući Komisije i Mirsad Salkić, član Komisije .

Sjednici je prisustvovao i privremeni sekretar Komisije za saobraćaj i komunikacije Ahmed Jalovičić.

Predsjedavajući Branko Dokić predložio je sljedeći

**D N E V N I R E D**

1. Usvajanje Zapisnika Konstitutivne sjednice, održane 15.2.2007.godine,
2. Razmatranje Izvještaja o radu Državne regulatorne komisije za električnu energiju u 2006.godini,
3. Zahtjev Plamenka Čustovića za razrješenje s dužnosti člana Upravnog odbora Javnog radio-televizijskog servisa Bosne i Hercegovine,
4. Prijedlog plana rada Komisije za 2007.godinu,
5. Ostala pitanja.

Dnevni red jednoglasno je prihvaćen.

**Ad. 1.**

Na prijedlog Zapisnika nije bilo primjedbi, pa je Komisija jednoglasno verificirala Zapisnik Konstitutivne sjednice, održane 15.2.2007.godine.

## Ad. 2.

**Predsjedavajući** je pozdravio sve prisutne , te pozvao predstavnike Državne regulatorne komisije za električnu energiju da daju uvodnu riječ o Izvještaju.

**Vladimir Dokić** je podsjetio da je DERK počeo sa radom 2003.godine , da se predsjedavajući mijenjaju svake godine, a da je trenutno u toku postupak izbora-reizbora jednog člana Komisije iz Federacije BiH, te da je Vlada Federacije BiH privremeno imenovala sadašnjeg člana Komisije Željka Topića do završetka procedure konačnog imenovanja. Izvještaj je obuhvatio cjelokupan rad u 2006.godini, mišljenja je da je najznačajnije poglavlje tri, gdje navedeno da je u toku 2006.godine DERK usvojio Pravila o pristupu treće strane, Pravilnik o zaštiti povjerljivih informacija i Odluku o uspostavi pojednostavljene procedure izdavanje licence za međunarodnu trgovinu za podnosiocima zahtjeva u statusu kvalificiranog kupca. Naveo je da je u oblasti licenciranja međunarodne trgovine po Odluci o uspostavi pojednostavljene procedure u novembru 2006.godine izdata privremena licenca za obavljanje uvoza električne energije za vlastite potrebe Aluminiju dd Mostar, a da je trenutno je u toku proces izdavanja stalne licence za NOS BiH i Elektroprijenos BiH. Što se tiče prava pristupa treće strane prijenosnoj mreži, proceduru provode NOS BiH i Elektroprijenos BiH. Pokrenut je postupak za izmjenu metodologije izrade tarifa za usluge prijenosa električne energije, kao i da je bitno napomenuti da je tarifa za domaće potrošače i za izvoznike do sada bila različita, potrebno je da se one izjednače, pa će na taj način doći do smanjenja tarife za domaće potrošače. U prethodnom periodu DERK je inicirao i aktivnosti na izradi pravila za zaštitu socijalno ugroženog stanovništva, pa su tako upućena pisma nadležnim vladama , gdje je Komisija iskazala spremnost da učestvuje u izradi programa zaštite ove kategorije potrošača.

Na pitanje predsjedavajućeg da li to predviđa povećanje cijena električne energije , pa da se tim sredstvima omogući realizovanje programa socijalne zaštite potrošača, Vladimir Dokić je odgovorio na nije jednostavno riješiti ovaj problem, a da studije pokazuju da je cijena električne energije u BiH najniža u Evropi. Dalje je naveo da je u fazi izrada Pravilnika o priključku, kao i da je NOS BiH izradio i dostavio DERK-u na odobravanje Indikativni plan razvoja proizvodnje za period od 2007. do 2016.godine, sačinjen na osnovu raspoloživih podataka u elektroenergetskom sektoru.

**Husein Nanić** je mišljenja da Indikativni plan razvoja treba da se razmatra šire , da je to suviše ozbiljno pitanje da o njemu odlučuje samo DERK.

**Vladimir Dokić** se saglasio da je dosta komplikovano pitanje stvaranje Indikativnog plana, koji se koristi u razvijenim zemljama kako bi država usmjeravala određene djelatnosti u cilju skladnog razvoja.

**Predsjedavajući** se zahvalio na izlaganju, te otvorio diskusiju o Izvještaju o radu Državne regulatorne komisije za električnu energiju u 2006.godini.

**Selim Bešlić** smatra da je potrebno da se na sljedećoj sjednici Komisije detaljnije razmatra Izvještaj, a naročito pitanje razvoja mreže i plasmana električne enrgije.

**Savo Erić** je istakao da pozdravlja inicijativu za izjednačavanje cijena za domaće potrošače i izvoznike, te ukazao na potrebu za što efikasnijom procedurom otvaranja mini elektrana kapaciteta od 5 do 10 megavata.

**Mirsad Salkić** je naglasio da je sprovođenje tendera za izgradnju mini elektrana u nadležnosti entiteta.

**Predsjedavajući** je predložio da izvještaj prihvati, uz napomenu da je potrebno obavezno razgovarati u Parlamentu BiH o razvoju elektroenergetskog sektora , jer smatra da je to najveća šansa za razvoj Bosne i Hercegovine.

**Husein Nanić** je predložio da se na ovoj sjednici ne razmatra prihvatanja Izvještaja, da se Izvještaj prima na znajnje, a da se na sljedećoj sjednici Komisije ponovno razmatra Izvještaj. Zaključak je jednoglasno usvojen.

### **Ad. 3.**

**Predsjedavajući** je ukazao da je Komisiji dostavljena ostavka Plamenka Ćustovića, te da je pred samu sjednicu dostavljeno i pismo Nikole Deretića, predsjedavajućeg Upravnog odbora Javnog radio-televizijskog servisa Bosne i Hercegovine, da sjednici prisustvuje Plamenko Ćustović, pa želi da ga zamoli da odustane od ostavke, jer se do kraja njegovog mandata ne bi okončala procedura izbora novog člana Upravnog odbora.

**Plamenko Ćustović** je istakao da se mora na početku izjasniti o pismu Nikole Deretića, koje jasno dokazuje da postoje strašni problemi u radu Upravnog odbora, te da se u pismu govori o izmišljenim gubicima. Napomenuo je da je generalni direktor Radiotelevizije Bosne i Hercegovine smijenjen nakon reakcije Vlade Republike Srpske, a da se najmanje govorilo o finansijama. Prilikom smjene direktora na dnevnom redu sjednice Upravnog odbora nije bilo uopšte te tačke, nego se naknadno uvrstila tačka "Aktuelna programska pitanja". Smatra da politika ne bi smjela uticati na javne emitere i da je smjena direktora podlijevanje političkom pritisku, što je potvrdio i OHR svojom izjavom. Naglasio je da je neadekvatno rješenje da Upravni odbor ima samo četiri člana, te da je ranije Upravni odbor donosio odluke jednoglasno, kao i da nije mogao više raditi u atmosferi nadglasavanja. Sve je to uticalo da podnese zahtjev za razrješenje, s ciljem da bi Parlamentarnoj skupštini BiH dao razlog da raspravlja o radu Upravnog odbora. Imajući u vidu navedene činjenice, povlači zahtjev za razrješenje.

**Predsjedavajući** se zahvalio Ćustoviću i otvorio diskusiju.

**Mehmed Suljkanović** je istakao da je očigledno da ima puno problema u radu Upravnog odbora, da nije svejedno kako će dalje raditi Upravni odbor i smatra da je potrebno zatražiti izvještaj o radu Upravnog odbora.

**Šemsudin Mehmedović** je mišljenja da je Ćustović olakšao problem povlačenjem zahtjeva za razrješenje, ali da se time neće riješiti problemi u radu Upravnog odbora, pa bi bilo korisno da se na sjednicu Komisije pozovu članovi Upravnog odbora, jer je očigledno da televizije u okruženju bolje prikazuju stanje u Bosni i Hercegovini nego Radiotelevizije Bosne i Hercegovine.

**Selim Bešliagić** podržava prijedlog da se traži izvještaj o radu Upravnog odbora.

**Sadik Bahtić** smatra da je situacija alarmantna i da treba pozvati na sastanak kompletan Upravni odbor, te da uopšte nije zadovoljan sa programom Radiotelevizije Bosne i Hercegovine, jer se iz Krajine ništa pozitivno ne objavljuje.

**Snježana Rajilić** je mišljenja da je sjednici trebao prisustvovati i Nikola Deretić, da bi bilo korisno održati sastanak sa Upravnim odborom, kao i da se Komisiji dostavi zapisnik sa sjednice Upravnog odbora kada je smijenjen generalni direktor Radiotelevizije Bosne i Hercegovine. Na pitanje Snežane Rajilić da li podržava rad informativne redakcije, Ćustović je odgovorio da nije zadovoljan njihovim radom, ali da Upravni odbor treba omogućiti adekvatne uslove za rad Radiotelevizije Bosne i Hercegovine, da osigura sredstva za rad, a da već postoje programska opredjeljenja.

**Husein Nanić** podržava konstatacije Snježane Rajilić, a da mu je želja kao članu Parlamenta da se otvori prostor ljudima koji žele časno raditi, kao i da uvijek biti na strani istine i profesionalnosti.

**Predsjedavajući** se zahvalio Čustoviću što je povukao zahtjev za razrješenje, te istakao činjenicu da mu je poznato kako je prijedlog naših predstavnika bio da Upravni odbor ima sedam članova, ali da je predstavnic međunarodne zajednice insistirali da Upravni odbor čine četiri člana. Smatra da bi bilo puno bolja situacija kada bi se o svemu dogovarali naši predstavnici, kojim se ne bi nametala rješenja, kao i da Parlament treba da se pozabavi medijima, jer se često manipuliše sa informacijama.

Komisija je u raspravi o ovoj tački dnevnog reda usvojila sljedeće zaključke:

1. Da se s dnevnog reda 4. sjednice Predstavničkog doma Parlamentarne skupštine BiH skine tačka 12. „Razmatranje zahtjeva Plamenka Čustovića za razrješenje s dužnosti člana Upravnog odbora Javnog radiotelevizijskog servisa BiH“, jer je imenovani odustao od zahtjeva za razrješenje.
2. Predlaže se Kolegiju Predstavničkog doma da uputi zahtjev Upravnom odboru Javnog radiotelevizijskog servisa BiH da u što kraćem roku dostavi Predstavničkom domu Parlamentarne skupštine BiH izvještaj o radu Radiotelevizije Bosne i Hercegovine za 2006.godinu, s obzirom da je ta obaveza Upravnog odbora utvrđena članom 29. stav 1. tačka k) Zakona o Javnom radiotelevizijskom servisu BiH.
3. Da se uputi dopis Regulatornoj agenciji za komunikacije Bosne i Hercegovine da na vrijeme započne proceduru izbora novog člana Upravnog odbora Javnog radiotelevizijskog servisa BiH.

#### **Ad. 4**

**Husein Nanić** je predložio da se na sljedećoj sjednici razmatra Prijedlog plana rada Komisije za 2007.godinu  
Prijedlog je jednoglasno prihvaćen.

#### **Ad. 5**

**Predsjedavajući** je podsjetio da se na sutrašnjoj sjednici Predstavničkog doma razmatra Odluka Vijeća ministara BiH o predmetu, obimu i vrsti koncesije u svrhu izgradnje Autoputa na koridoru 5c, da je Parlamentarna skupština ranije usvojila zaključke u cilju ubrzanja postupka pripreme za izgradnju Koridora 5c, kao i da nikome neće biti ugrožen interes ako se usvoji ova Odluka.

**Snježan Rajilić** je ukazala da član 2. Odluke nije dobar, da Federacije BiH već pravi dio autoputa, te da nije uopšte definisano šta će ići u prihod koncesionara, odnosno da li će ići i prihod od dijela autoputa koje izgradi Federacija.

**Selim Bešlić** je mišljenja da je upravo zbog različitih tumačenja potrebno donijeti Zakon o Koridoru 5c.

Završetkom rasprave po ovoj tački dnevnog red, sjednica je završena u 16,25 sati.

PRIVREMENI SEKRETAR KOMISIJE  
Ahmed Jalović

PREDSJEDAVAJUĆI KOMISIJE  
dr. Branko Dokić